


Fulan Agostu– Setembru 2013

SDB no FMA

HAFUTAR AN HO KÓR KSOLOK NIAN

Oratóriu iha Tímor: Uma fiar nian



ATIVIDADE síra

Sai responsavel

Bain-bain, bainhira ema ida simu responsabilidade ida, nia sente katak buat ne'e ninian no hala'o ninia knaar ne'e ho atensaun boot liu. Dala barak, oratorianu sira tuir atividade, maibé "tuir" de'it, katak ita la envolve sira iha preparasaun, ita la entrega ba sira knaar ida (dala ruma animadór sira mós la sente oratóriu nu'udar sira-nia uma tanba sira la simu responsabilidade ida!). Ita bele fahe serbisu ba oratorianu sira: se mak sei hatama bola sira bainhira oratóriu hotu, se mak toma konta ba surat tahan knananuk sira nian, nst... Maibé mós bele hanoin atu fó responsabilidade ba sira kona-ba "ema" la'ós sasán de'it. Iha oratóriu Valdocco nian, Dom Bosco hili foin-sa'e ruma ne'ebé sai "anju da guarda" ba sira seluk. Ita bele halo nune'e ho ita-nia oratorianu sira, katak iha grupu ida-idak labarik/foin-sa'e ida toma konta kona-ba ninia kolega seluk: se nia falta, se domingu ida nia laiha, ninia "anju" sei ba haree tansá, sei ba konvida fali nia atu... bibi ida sei la lakon!

1

KONKURSU: Ha'u mak diretór oratóriu nian

"Se ha'u diretór oratóriu nian, ha'u sei ..." Propoin tema ida ne'e ba oratorianu sira, no husu ba sira atu hatán ho dezeńu ida ka hodi hakerek sira-nia hanoin. Halo tiha, bele buka fatin atu hatudu no bele forma komisaun ida ne'ebé sei fó premiu ba "diretór" ne'ebé tuir di'ak liu Dom Bosco nia ain-fatin.

ANIMADÓR sira ULUK nian

Imi hatene bainhira imi-nia oratóriu hahú? Oratorianu sira bele husu ba irmán (ne'ebé bele lee ba sira "Cronaca" uma nian) no padre ka irmaun sira se sira hatene oratóriu nia istória. Hafoin bele buka foin-sa'e sira ne'ebé sai animadór bainhira oratóriu hahú no entrevista sira kona-ba sira-nia esperiênsia:

- Saida mak sira hanoin hetan kona-ba esperiênsia nu'udar animadór?
- Bainhira oratóriu hahú, sira hala'o atividade sa de'it? Oinsá sira konvida labarik no foin-sa'e sira seluk atu ba tuir oratóriu?

3



JOGU

DEFENDE BANDERA (di'a liuk halo jogu ida ne'e iha liur)

Materiál: ba grupu ida-idak prepara kartu 1 mean ba jenerál (vale pontu 5), kartu 2 azul ba komandante (vale pontu 3) no kartu 3 matak ba kapitaun (vale pontu 2). Membru sira ne'ebé laiha kartu, iha valór 1. Presiza mós bandera 1 ba grupu ida-idak.

Preparasaun: iha kampu nia ninin marka kuadradu ida (naruk m. 2) iha sorin loos no ida iha sorin karuk: ida ne'e mak bandera nia "uma" no grupu ida-idak sei tau ninia bandera iha kuadradu laran (di'ak liu iha banku leten). Grupu ida-idak sei hili membru 3 ne'ebé sei tau matan ba bandera, maibé la bele tama iha kuadradu laran. Molok hahú jogu grupu ida-idak sei fahe sira-nia kartu entre membru sira hodi la hatudu ba grupu seluk. Di'ak liu organiza grupu hanesan tim tebe-bola nian ho membru ruma ne'ebé, maski la tau matan ba "uma", defende no membru ruma ne'ebé ba ataka.

Objetivu jogu nian mak lori grupu “funu-baluk” nia bandera iha bandera rasik nia uma.

Bainhira jogu hahú grupu ida-idak haka’as an atu ba foti bandera seluk no defende ninia. Se oratorianu ruma la’o hodi kaer liman, tenke sura sira-nia valór hamutuk. Bainhira kaer “funu-baluk” ruma, ema ka sira ne’ebé kaer tenke deklarar valór: se ida ka sira ne’ebé kaer “funu-baluk” iha valór boot liu fali “funu-baluk” sira bele lori ema dadur ne’e ba bandera nia “uma”. Se “funu-baluk” iha valór boot liu ema/sira ne’ebé kaer, nia bele kontinua halimar no ida/sira ne’ebé kaer nia sei tuur iha rai to’o bainhira nia kolega ida sei book nia hodi liberta nia. Bainhira ema ruma sei kontrata daudaun sira-nia valór, ema seluk la bele book sira ka kaer; maibé bainhira jogadór ruma sei lori daudaun ema dadur ba bandera nia “uma”, sira seluk bele kaer sira hodi kontrata sira-nia valór. Bainhira ema ruma tama iha uma “funu-baluk” sira-nian, se karik iha kolega ruma ne’ebé dadur, sira ne’e mós bele halai. Foti tiha bandera, tenke lori to’o “uma” rasik; tan ne’e se “funu-baluk” ruma kaer ema ho bandera no sira-nia valór boot liu fali ida ne’ebé foti ona bandera, sira sei lori nia ba bandera “uma” hodi tau fali bandera iha ninia fatin. Grup u ne’ebé lori “funu-baluk” sira-nia bandera iha sira-nia uma rasik, sei manán jogu.



DOM BOSCO nia esperiênsia

Iha tempu bailoron 1854 iha Torino, hahú moras ida ne’ebé hamta’uk ema hotu: kolera. Moras ida ne’e hahú iha fatin ida, Borgo Dora, ne’ebé fo’er liu; fatin ida ne’e besik liu Valdocco no Oratóriu Dom Bosco nian. Iha fulan ida nia laran, ema na’in 500 mate no 800 mak moras; família ruma ema sira mate tuir malu iha loron ruma nia laran. Dom Bosco hanoin kedas ba ninia foin-sa’e sira: nia antisipa kedas ezame finál sira, nune’e nia bele taka eskola sira no haruka estudante sira ba fali uma iha foho. Foin-sa’e sira ne’ebé hela tulun atu hamoos didi’ak kuartu sira. Hamutuk ho kuidadu ijiene nian, Dom Bosco tau ninia fiar; kalan ida nia rona foin-sa’e sira ko’alia kona-ba buat ne’ebé mosu iha sidade, ema barak ne’ebé mate iha Torino, nune’e, hodi konvida foin-sa’e sira konfia iha Na’in Feto, nia dehan: “Doben sira, se imi promete mai ha’u atu la halo sala ho intensaun, ha’u bele dehan ba imi katak, maski ita sei ba asiste ema moras sira, imi ida sei la kona moras ida ne’e”.


Iha Borgo S. Donato, bairu ida tan besik Valdocco, ema prepara fatin rua atu simu ema moras sira, hodi hadook sira husi sira ne’ebé isin di’ak. Dom Bosco, ne’ebé hamutuk ho amlulik ruma, ba ona atu haree ema moras sira, fó hatene ba foin-sa’e sira katak Administratór lokál husu ba sidadaun hotu ne’ebé responsavel, atu ofere se an nu’udar enfermeiru no asistente ba ema moras sira kolera nian, no Dom Bosco husu se mak hakarak halo obra karidade nian ne’e. Na’in 14 kedas hatán ba ninia proposta no loron ruma liu tiha, na’in 30 tan tuir sira ne’e nia ezemplu.



IMAJEN

Kuadru ida ne’e reprezenta Jezús hamutuk ho sasin ruma fiar nian. Hamutuk ho labarik sira bele koko atu rekoñese sira.

- Bele dehan ida-idak nia “servisu” ka atividade ne’ebé nia hala’o bainhira sei moris? Oinsá sira tau matan ba maluk sira hodi hatudu sira-nia responsabilidade nu’udar sarani?
- Sira iha ne’ebé? Jezús kaer saida ho liman karuk? Tansá?



ORASAUN

Dala ruma, iha selebrasaun sira, bele rona ladaña santu sira nian. Hodi foti inspirasaun husi kuadru ida ne’e, bele koko atu hakerek fali ladaña hodi temi santu sira-nia knaar? (ez: S. João Bosco ne’ebé eduka foin-sa’e sira; S. Giuseppe Moscati ne’ebé tau matan ba ema moras kiak sira...)